

古今遊記叢鈔

第九冊

上海中華書局印行

古今遊記叢鈔

卷之三十九 雲南省

滇南新語

清張泓

新興田地最饒。赤旱不荒。蓋由各龍潭之灌溉也。潭有五。或在山之巔。或在巖之下。最廣者曰黑龍潭。而白龍潭之水獨奇。潭居巖下。村人引水上行。能盤旋度山頂。頂哇俱滿。猶餘潤過嶺諸村落。俗謂彼村有女子。昔爲龍所娶。故逆水過嶺以利其土。又諺有水行十里上牆頭之語。余思水性趨下。前人藉不竭之潭水。殫其智力。縈迴作渠。盈科後進。勢雖漸高。流仍平也。諺語殊可味。然別潭無効之者又何故。或曰彼山少土而多石。

新之三月三日。必風雲起。白龍潭大雨雹。至黑龍潭而止。俗云龍會龍。且雹不損禾。余親驗之五年矣。信然。

滇之硃砂蘭。稱神品。葉與建產同。花稍大。莖高尺許。一莖十餘花。色如渥丹。香清冽。過

諸種。開於夏秋之交。出南掌國孟艮。土人貿易攜歸。惟新興人善養護。蒙化間効之而劣。他郡邑種之不花。值頗昂。一莖需銀十五星。然得一盞置書室中。對啜茗。真君子之室也。吾友周梅園。載數莖至維揚。人皆驚奇來觀。門幾如市。乃性不耐寒。經冬槁矣。又有雪蘭。一莖三花瓣。如通草。心吐微紅。葉柔如綫。秀美怡人。歲暮迎年而開。更覺可愛。

土主神。傳爲大士所化。作男像。滇人奉之謹。研和者。古玉乞城也。有廟藏土主印。志載歲旱出印。則立雨。余取視。一三角有紋。頑石耳。土人云。自吳逆兵火後。已無靈。山茶宜於滇。惟銀紅大紅二種。在在有之。無黃白錦邊各色。而常一樹千花。俱大如盞。瓣若連環相扣。洵足美觀。通海縣螺頂者。名尤著。

迤西楚雄大理等郡盛杜鵑。種分五色。有藍者蔚然天碧。誠宇內奇品。余得一本。爲人索去。然滇中亦不多觀。

有草出迤西名都拉。能解諸藥性。凡市藥者遠而棄之。誤入藥室。則諸品不効。雖砒石之烈。亦化爲烏有。服毒者用此立解。其形類梔子而黑。

合和草生必相對。夷女採爲末。暗置飲饌中。食所厚。少年則眷慕如膠漆。効勝黃昏散。不更思歸矣。反目者宜用之。多生夷地深山中。余戲謂友人曰。此氤氲使者也。合和云爾哉。而或則資以逞慾。謬矣。

賓川州九鼎山廟中。產香附子。太如欖核。中心橫切。作紅白太極圖如繪。故用者奇而重之。

滇之省會。卽秦苴蘭城。傳爲莊蹻所建。週九里十三步。五華聳其中。吳逆三桂架以宮闕。萬家煙火。一片昆明。羣山如拱揖。誠勝境也。山下卽菜海子。有大池可百畝。赤旱不竭。土人於中種千葉蓮。有隄如西子湖頭。兩岸柳皆合抱。迤邐至御龍寺。寺祀龍神。花木扶疏。迴廊疊石。昔吳逆園圃也。去寺西北半里許。有逆家廟。俗稱洪化府。今改爲別駕署。丹垣猶在。餘蔓草矣。夫三桂受我朝大恩。若果精忠不二。國家豈惜待以沐氏。而乃謀逆自滅。獨何心哉。

人謂滇地多龍窟。余初以爲不經。辛未六月五日巳後。省邸頗晴朗。忽亂雲起西北。近乃凝而不流。五龍矢矯。長百丈。懸空際。一護以白雲。餘則黑霧罩之。始見其身可二三

圍漸上縮細如杖。其白者尾裊裊復自上漸下。如初從地起者然。突與白雲俱墜西城外。俄而雨點如飛槁葉。龍仍冉冉升天表。白雲擁之。復縮細如綫而隱。未幾西郊農民呈報。小龍白色墜田間。蹂禾百餘畝。房屋圯近三十間。院司飭令驗實賑恤之。噫。滇果龍藪也哉。吾將學爲參龍氏。

乾隆己巳正月二十日戌刻。省城風雨大作。電光射人可畏。雷訇訇聲不斷。忽霹靂一震。凡大小衙署。從外至內。中門洞開。雖重扉疊幢。燈火俱熄。民居亦然。大小東關橫木重鍵。皆折若截薪。五華山之東北隅。官民廨舍。共傾頽一千六百餘棟。火藥局十一間。陷爲深阱五尺餘。局貯鎗刃。咸屈曲飛散。挂數里外。各檐牆焦頽。分插遠近街衢。及瓦罅中。礮重千百斤者。悉覓歸自城外各田間。余嫗家董策三觀察公署。鄰於局。亦化爲瓦礫場。向聞楚北康熙中失燬火藥局。與此情形相類。惟此有雷雨之異耳。當事以藥局起旱蛟致並燬民居詳奏。奉旨飭賠。誠坐照萬里矣。

有綰青篆翠。翹翹如髻。處省城內之北隅者。曰螺山。又名元通。於懸峭紆迴中。建元通庵。山半懸絕處。翼以危亭。登巔遠眺。則昆明可盥。太華可撫也。下有潮音洞。俗名紅孩。

談其蹟者。鄙謬解客頤。洞深里許。然炬可遊。今以藏奸塞。尙斂尺餘存其意。惟每歲孟夏。蛺蝶千百萬。會飛此山。屋樹巖壑皆滿。有大如輪小於錢者。翩翻隨風。繽紛五采。錦色爛然。集必三月始去。究不知其去來之何從也。余目覩其呈奇不爽者。蓋兩載。碧鷄關在雲南府城西三十里。爲迤西咽喉要區。一峯秀拔。接太華諸山。山不甚高。而晉寧呈貢昆陽昆池等處。了了在目。余從劍陽來省。必停輿久坐。流覽其勝。有雲海盪心胸之概。眞全滇第一區也。核關名所自。通志引漢宣遣王褒入蜀。禱金馬碧鷄事。然廣輿記載。四川崇寧縣有金馬碧鷄神祠。與漢史符。則神之在蜀無疑。而志滇者引之。亦文人假事以炫異耳。但滇本益州地。其神之出處亦荒怪。卽謂爲實。棲此關也。蓋無不可。

鎮南州之西有平岡。產仙人骨。云爲仙蛻所遺。色白類鷄骨。食之愈諸疾。余每過此。命童子拾各盈掬。幾盡矣。不轉瞬琅琅復生。有心取之。又無所見。周櫟園書影所載汀州藍田之蠟燭峯。下產糯米。色白雜沙礫中。若經火微煨。能治心痛。亦取之無盡。正與此同其異。

廣南府有韋土官。傳爲漢淮陰後。當鍾室難作。客匿淮陰三歲。兒見蕭相國。蕭云。中國不可居。惟急跳粵耳。乃遣客致兒於趙陀。且遺陀書曰。此淮陰兒。公善視之。陀遂養爲己子。封之廣南。賜姓韋。存韓之半。今族繁。世官於廣南。聞所藏鄼侯書。尉陀詔。俱勒之鐘鼎。然余常疑之。夫淮陰之誅。夷及三族。雖赤帝子假手於呂雉。而何實爲謀主。豈不知嬰杵爲鑒。余意爲此者。其蒯生之流歟。

劍池產鯽魚。帶其魚與常鯽無異。重亦不過斤許。腹內有帶如鰾。寬二三分。長尺餘。玉色晶瑩。多或八九莖。冬深帶滿。腹脹裂如被創。帶從孔出。買魚烹食。甚鮮美。取帶曝乾。應手脆折如粉。

取豬重百餘斤者。去足剗腸胃。剔諸骨。大石壓之。薄膩若明珀。形類琵琶。因名琵琶豬。麗江女子。挾以貿遠。望若潯陽商婦也。

碎切生彘肉。雜以生豆腐。豆瓣蒜醋之屬。或挺擊豕鬣。叢草燎毛。入澗滌淨。俶前切製。均生啖。如嗜珍錯。遇佳節。則比戶皆然。然劍人究以燎毛者爲上品。

大井。東井。橋井。新井。復井。沙井。爲井六。黑鹽。其總名也。東沙二井。在溪河中。東井有天。

然石磯障上流。又增以壩。俗名曰豬鬃。四時無泛淡之慮。且河漲井益鹹。大異他井之視霖雨若仇也。沙井則夏秋沒洪波。臨涸所煮鹵甚微。例作餘鹽。大橋新復四井。俱穿自山根。與東沙二井迥異。深各五六丈。架木如梯而下。及泉各一二眼。積溢過眼。泉卽滯不湧。然鹹泉必依淡水以生。復井淡水居鹹泉之上。仰塞猶滴。必盎盛別傾之。大漏則鹹解水混。盈覓補每不易。隔鹹泉數武。開淡井者。惟大新二井有然。晝夜並汲。互相盈縮。而在河岸下之橋井。與東沙俱無淡泉。蓋鄰於河也。汲鹹用皮袋。去淡恃桔槔。鹹泉覆以屋。鹽貯於槽所。司秤量而出。竈戶領以煮。掘地爲竈。約坎深四尺。長逾丈餘。後稍昂。坎內沿以石牆。高過坎三四寸。寬可六七寸。外繞小石渠。坎前開火竈。一以爨。牆內平坎處。前層齒齒。安廢鍋片。架重六七十斤。大鍋五。後層坎內直間以牆。高如坎。排大鍋四或六。儘後安大鍋二。高出前鍋五六寸。各鍋相次之隙。小則掩以泥。大則以小桶子鍋。周匝實之。先注鹵於前層各鍋內。煮乾三四分。則轉注後層。而前層復上新鹵。迨轉至極後鍋內。以杓揚試。水鹽已相半。鍋或沸。以竹枝鉗生豕油蘸之。卽止。尾二鍋鹽先結。邊實中虛。名曰鹽埕。取出。安騎牆各鍋內。火足則中邊皆實而鹽成矣。餘火大

小剩微鹵耳。其成鹽各鍋。始俱染以清油。乃登竈受鹵。及鹽成堅如石。猶錘鑿始盪脫。每脫曰一平。大鋸解之作五六十斤塊。乃秤而加印記。載以歸省局。其竈八日一易。竈丁和坎渠各殘泥入鹵復煮。故色多黝。但不宜久積。久則臭蟲穴以處。解之常流血。此外有獅子燈臺柿餅沙包瓢塊等鹽。皆他產之象形以得名者。

滴水箐在復井南二十里。無井。兩山如複牆。誠一綫天也。中有石壁削立。壁間小孔。滲水浸凝。其下有澗。澗上置溝。土人汲水。仰潑壁上。隨流下溝。卽鹹。度入竈內煎之成鹽。年獲三四萬斤。夏秋雨多。卽停煎矣。

自楚之武陵。過辰沅。度夜郎。抵苴蘭城。征人如梯石登天。星月漸低。若可捫。山蟲蟲不異。蠹叢。偶坦處曰壩子。卽城爲郡邑。耕者繞其間。田皆有泉。常涓涓不畏旱。山產五金礦。余牧新興。聞有湯丹青龍等廠。勞勞未遑一觀。乾隆甲子夏五。攝路南篆。亦有廠。甫視事。卽檄辦秋闈。又不果往。乙丑春。路民犂城西象羊山地。得礦苗。呈請開之。遠近來者數千人。得礦者十之八九。不數月而荒巔成市。卽名之曰象羊廠。余始因巡閱得其概。其山不甚深峻。方未開之先。日暮有白色象羊散滿巖谷。村人逐之。皆化爲流雲。山

因以得名。迨甲子冬夜。有聲自山起。殷殷如雌雷。漸至城內。比戶疑爲祟。汛官李鳴岐。常於三鼓後率兵巡警。施鎗礮而響如故。且聞聲在東。追之則西。至西亦然。奔馳逾月。迄礮見始寂。夫地不愛寶以養民。民賴此以生者。將千萬指。故未出現象羊。將出有先聲。蓋山靈之所以深示其慎重也歟。按路舊有廠四十七。開自勝國。今已大半竭。餘鳳凰紅石大龍泰來數廠而已。歲共產銅不萬斤。其不加封閉之故。緣產綠碛石也。石色如鸚鵡翠羽。光膩若凝脂。淨者可混綠松。每千斤獲銅不及一二十斤。琢爲器。價數倍象羊。獨無象羊之廠。踞山巔。羣裹糧搭席棲其上。曰火房。招集工丁曰小伙計。或稱弟兄。司飲食者爲鍋頭。架鑲木者爲廂頭。開礮曰打礮子。碛有引綫。老於廠者皆識之。依綫打入。一人掘土。數人負出。曰背荒。土內有豆大碛子者。曰肥荒。檢之尙可煉以易油。米碛之深下者曰井洞。平開者曰城門洞。洞中石圍土砂者曰天生洞。洞口不甚寬廣。人皆偃僂入。慮內陷。支以木。間二尺餘。支木四曰一廂。洞之遠近以廂計。上有石則無慮。廂亦不設。洞內五步一火。十步一燈。所費油鐵約居薪米之半。而編查防奸。控制得宜。則有司之責綦重矣。礮之最佳者曰綠錫礮。煉千斤則銅居其五六。次曰白錫礮。爛

頭錫礪。再次曰硃砂錫礪。銅居其三四。下者曰牛版筋。僅可敷炭價。若夾石礪稠礪哈礪。則每千斤不過獲銅四五十斤。得不償失。遇者有憂色。咸品搭於佳礪內以煉。煉礪曰扯銅。其法礪千斤。用炭七八百斤不等。鑪如夾牆底作圓窠。鋪以炭末。始加炭。礪置炭上。竅其後。置風箱前。下開孔如半月。封以泥。稍上復開一竅。火盛礪鎔。則砵自此出。而銅沈於底。砵竭流卽銅成之候矣。鉤去半月封泥。先掣餘炭既淨。用米飲潑入。設投以水。則爆炸而銅不完好。少間銅面凝結。鉗出如蟹殼。次第潑取。每鑪得銅可六七餅。呼之曰元。嗟乎。何天地之生物無盡。而人之取之者。亦無遺策也。至土洞深開。爲積霖所陷。曰浮洞。鑿者常被壓。陷封洞門。人亦氣閉卒於內。常數人及數十人。歲所間有。可異者後人不知其曾浮。每重開或旁及見屍橫斜。爲寶氣所養。面如生。有突立向人索飲食者。遇則唾而啐之。卽僵仆。名曰乾蟻子。人習見之無足怪。新廠尙無。余聞之老於湯丹者云。每廠衆推老成一人爲客長。立規最嚴。犯者受其責辱。不敢怨。常有東西異綫打入。共得一礪者必爭。經客長下視。定其左右兩比。遵約釋競。名曰爭尖子。品尖子向非廠規素立。愚衆之命禍。豈鮮也哉。

滇之天無大寒暑而五穀成地有大川澤而蝦蟹飽。辰風西息。日揚沙以拔木。必自西南來。三愆則雨至矣。風烈於冬。春而雨。僅夏秋雨盛。風乃稀。佳節吉事。藉地以松毛。否爲不敬。巨富不過萬金。以一二百金設典鋪。亦稱當商。女子纏足不裙。多隨地坐。衣不忍浣。恐頻浣而損。雖士子近前。亦每令人掩鼻。有街無市。人貨集於趕街之期。閒時闕然。

滇之香櫞佛手。大倍閩粵而不香。瓜梨杏棗櫻桃蘋果之類。味俱淡。有黃果類柑亦然。惟元江之荔枝。阿彌之綠石榴。晉寧之天生梨。差堪沁齒牙。回憶中原佳品。蓋渺渺瑤池也。

滇夷種多而俗異性殊。擺衣柔狡。沙人剛戾。獼猴愚癡。獠子善記仇。數世猶報。各居巖穴。能陟險。或刀耕火耨。或射獵爲食。皆難以禮法繩。惟麗郡中甸維西之把獠。獠獠獠。獠獠悍奉喇嘛。其親死必延喇嘛問之。名刀把或擦媽。向屍誦經呪。刀把謂死者無罪。則懸屍山樹之極巔以風。曰天葬。謂有罪。則籠屍沈諸江。曰水葬。或割屍飼禽獸。而火其骨。截脛骨作筒吹之。曰火葬。此皆梵書捨身餵鷹虎之說也。然各種多食生。且有噉

生蛇者。男女皆佩刀。習鏢弩。好鬪輕生。服飾詭異。難以筆罄。自設流官後。有麗守管學。宣能化導。革殘骸之俗。偉哉。

口琴。剖竹成箴。取近青。長三寸三分。寬五分。厚一分。中開如笙之管。中簧約闊二分。簧之前筍相錯處。狀三尖犬牙。刮尖極薄。近尖處厚如故。約後三分漸凹薄。至離相連處。三四分復厚。兩頭各鑿一孔。前孔穿麻綫如縵。以左手無名指小指挽之。大食二指捏穿處如執柄。橫側貼腮近唇。以氣鼓簧牙。其後孔用綫長七八寸。尾作結穿之。綫過結阻。以右手之食中二指挽綫。徐徐牽頓之。鼓頓有度。其簧閃顫成聲。民家及夷婦女多習之。且和以歌。又一種寬僅半。兩端瘦削。中作一牙。簧無孔。綫三片並用。而音各異。以左手前三指平執而吹。以右手前三指參差掩其末。亦呶喔可聽。似有宮商。此惟二別。邇及蘭州之夷女盛吹之。

響水關。旁飛峭壁。兩岸懸絕。中臨深淵千丈。水如沸湯。石峻峻攢排利刃。一失足則成蜜粉。浮木觸之立碎。前賢作鐵索橋。懸架板屋於其上。遂爲通大理諸邊之坦途。瀾滄江渡。更覺險奇。兩岸險逼。無隙可施鐵索。土人乃作溜渡。俗名曰溜筒江。江寬阻約二

三十丈。用大松纜圍徑尺者二。牢繫兩岸石樁。渡彼岸者東高。渡此岸者西高。以堅藤或絞竹作三圈。牢加羅織。以圈貫纜上。曰溜筩。欲渡者以繩縛圈中。與縛放豚而肩之。無異。岸人力送。卽梭逝。至半渡。纜弓彎。筩亦搖蕩如鞦韆。少停。必自以兩手遞援。始登彼岸。左往右來。兩無礙。至貨物亦縛於圈內。另以細繩繫圈上溜。至中恐或停阻。用力抽曳。使動而易下。亦頗迅。昔運軍糈出口。由二別邏渡浪滄。曾閱此。眠龍洞在鶴郡山中。爲郡人李某題。所謂眠龍者。相傳建文曾駐錫於此。余考之野史。稱建文遜國時。從亡。惟程濟。葉希賢。楊應能。同避迹於鶴慶浪穹諸山中。洞喚眠龍。或據是乎。離眠龍洞十數里。有潛龍庵。雙忠墓在焉。蓋卽應能希賢兩君埋玉處。菴之昔爲建文所居無疑。而洞爲建文所常往來。更足徵矣。及讀新頒明史。見建文殉國事。始恍然於齊東之惑人也。乃如是。

鳳眼洞在榆城西。蒼山旁支也。城距洞十里。山徑寬坦而陡。上宜馬。下宜轎。中有龍鳳寺。寺爲僞提督園。建屋僅數椽。可收大理全勝。鳳眼居其南。中有捨身臺。上空下洞。杳冥莫測。近臺吐崖懸虛際。步未及而心已悸。崖畔有仙人牀。平石耳。躋寺北半里許。卽

龍眼洞。嶽崎巖劣。險難置足。歸寺覽游擊曹士貴詩。并重修寺記。文簡明。詩亦佳。有空山寒不夏。老壁色常秋之句。洵妙才也。

龍鳳寺。牆藉峭壁。約千尋。聞壁上有綠玉。水從中出。視之。綠色一圍。不及尺。無光而燥。似以銅綠塗之者。王游擊順業云。昔瑩潤可愛。後爲麗江沐土官。以藥箭射之。乃晦。老僧云。此玉尾耳。頭在箐內。人不能取。姑漫聽之。

辛酉歲。余始入滇。牧新興。聞其地常動。未之信也。乙丑調邊牧劍川。越六年。間日無風。地每作聲。或微搖。箚環簾鉤。競如鳴珮。然亦偶耳。庚午簡調提舉黑鹽井。奉老母攜眷屬之新任。士民祖道。旣深戀戀。而劍署之河房亭榭。碧水紅橋。凡經余點綴者。亦覺依依不忍別。辛未竹醉。遙傳劍川五月朔午時地震。而黑井處萬山中。莫究其實。以爲此余昔見事。無足詫。秋七月。忽接飛檄。調余復回劍任。辦理災後事宜。檄開民人壓斃千餘口。城垣衙署倉庫祠廟民居。悉爲瓦礫。余卽欲星馳就道。而署楚雄府者。苛於交盤。強絆至十月下浣。始離黑井。然爲劍民切切抑鬱。廢寢食者幾三月矣。兼程趨劍。於仲冬望前甫至境。父老紳士數百人。迎馬首痛哭。謂天幸餘生。復獲覩余。余亦不禁相對。

漕然。卽住海虹橋梵刹。亟詢地震始末。及災後各倒懸狀。衆云。父母去後。自冬及春。州人已苦疫。地若波載舟。撼甚。粵稽陳蹟。每甲子後。遇辰戌丑未年。必大震。憶六十年前。逢戌已驗。凋瘵過半。今又遇甲矣。且逢未。萬姓預有憂色。五月朔日卯時。地已搖。辰刻日蝕復明。煩熱而氣昏慘。無風。至巳動甚。屆午有聲西北來。如驚潮決障。萬馬奔騰。煙塵蔽空。行者立者盡顛躓。屋宇如摧槁。始猶匍匐思避。繼皆昏迷撲地。莫知所以。震既定。將一時。萬籟俱寂。靜若長夜。更一時。哭聲震天矣。萬家樂土。倏變蠶叢。街衢阜塞。忘城南北。旣不知何處爲吾廬。且不知吾之骨肉親戚存亡安在也。依稀檢索。死態萬狀。不忍備述。四鄉皆然。鳥巢墮散。山石飛擊。虎豹亦斃。惟西南稍輕。共計死者三千餘人。傷重繼亡者二千餘人。破顛斷臂毀面跛足者。難更僕數。傾屋一萬九千餘間。最異者震後城內外井。悉涸無點滴。而釜竈皿物全損。斷火食者數朝。東北太平等村。悉爲劍海所浸。海尾墳起。至今扼洩。沿湖一帶叮哇。皆付波臣。民編蘆以棲。雖我父母來。亦無片厦以待。而地猶時搖搖也。語竟復大慟。余亦不覺失聲。嗟余去劍一年耳。何吾民之罹災遽至此極也。乃強收淚慰藉之。因齋宿。於十三日晨興赴任。海虹距州治二十里。

途中山樹猶識。村落異舊。淒涼滿目。城郭俱非。葺松架棚。拜闕上任。所謂紅橋碧水臺榭。河房均爲烏有。乃急畫民居。弛官山禁。令民伐木。開窖造甎瓦。且及農器什物。蓋春秋兩易。其閭閻震傾之一萬九千餘間。煥然鱗比者。勘已一萬六千餘間矣。官署倉庫祠廟汛房。亦奉檄承修。始於壬申九月朔。至季冬已報竣。惟城垣以部駁未及造。而兩載之中。又自有夙夜遑遑。更爲吾民謀衣食者。

劍川有池曰劍海。周四十餘里。上納麗江。維西萬山之水。下由海尾河。西達沙溪。走浪穹縣。匯大理諸水而趨金沙江。海尾河長一千九十餘丈。寬約七丈。平時劍海水漲。賴此以爲宣洩。海水如鑑。漁舟千百。菰蒲荇藻。掩映其中。四圍山樹。頗類西子湖頭。沿湖村莊田疇。錯落如畫。亦邊末之巨觀也。辛未夏震後。東北地下陷一丈五尺。水勢逆趨。致桑嶺大平邑頭等七十餘村屋宇田地。悉爲巨浸。海尾河水濶不流。土人誤謂河身震高。而不知東北陷下也。署牧某匿不報。七十餘村民人流離丐四方。而催科之令。數月如風雨。余復任。履村細勘。訪查形勢。用水平較量。始知東北地低。海尾河一丈五尺。無怪西濶東浸。河不受洩也。始具詳請緩地震災民賦。又請深濬海尾河以疏洩衆流。